

Time - 7:30 -7:40 Hrs  
AKASHVANI AIZAWL

## REGIONAL NEWS BULLETIN

### HEADLINES (MORNING)

1. Mizoram Legislative Assembly fur thutkhawm vawiina neih turah Chief Minister Pu Lalduhoma'n Mizoram state official hla atana Rokunga phuah 'Ro Min Rel Sak Ang Che' tih chu Official Resolution hmangin a pu lut dawn.
2. Chief Minister Pu Lalduhoma'n Bana Kaih Scheme hnuaia Progress Partner loan hmu tawh zat chu mi 483 an ni a ti.
3. Home Minister Pu K Sapdanga'n Remna Thuthlung-a Mizote tana thil tha iniziak zingah Inner Line Permit chu State Sorkar rawn (consult) hmasa lo chuan siam that leh hlih a nih lohna tur thu dah tel a ni a ti.
4. Nepal-a lui tuilian thut avangin mi 160 dawn an thi a, India mi 133 tiamin mi 759 chuang chin hriatlohin an awm

<><><>

### ASSEMBLY SESSION

Mizoram Legislative Assembly fur thutkhawm ni 2-na chu vawiinah chhunzawm ani dawn a, Chief Minister Pu Lalduhoma'n Mizoram state official hla atana Rokunga phuah 'Ro Min Rel Sak Ang Che' tih chu Official Resolution hmangin a pu lut ang.

Assembly thutkhawm hi chawhma dar 10:30 ah tan a ni dawn a, zawhna leh chhanna hun darkar khat hman anih hnuaia Committee Report hrang hrang pharh ani dawn a, heng zingah hian Comptroller and Auditor General of India leh The Mizoram Electricity Regulatory Commission (Electricity Supply Code) Regulations, 2026 a tel a ni.

*Mizoram Legislative Assembly fur thutkhawm vawiina chhunzawm turah hian Chief Minister Pu Lalduhoma chuan Mizoram state official hla atana Rokunga phuah 'Ro Min Rel Sak Ang Che' tih chu Official Resolution hmangin a pu lut dawn a, ruahman dan chuan hemi zawh hian Bill 4 - The Mizoram Goods & Services Tax (Second Amendment) Bill, 2026 leh The Mizoram Floodplain Zoning Bill, 2026 leh The Mizoram Industrial Area (Management, Regulation & Control)(Amendment) Bill, 2026 bakah The Mizoram (Land Survey and Settlement Operation) Bill, 2026 te chu House ah sawihwa pass tum a ni ang.*

*Assembly thutkhawm August ni 25-a bultan hi ni 2 chhung neih tura ruahman a ni a, pawhsei anih loh chuan vawiinah tiamchin awm lova tih tawp a ni ang.*

<><><>

CM : PMJVK

Chief Minister Pu Lalduhoma’n PMJVK scheme hnuaia Mizoram in Central-a Project a thehluh mek chu 25 a ni a ti a, tun dinhmunah sanction hmuh ala awmlo tih a sawi.

Mizoram Assembly thutkhawma East Tuipui bialtu Pu Ramthanmawia zawhna ziaka a chhanna ah he thu hi sawiin Pu Lalduhoma chuan PMJVK scheme hnuaia Mizoram in Central-a Project a thehluh mekte chu scheme hrang hrang niin Union Cabinet pawmpui a ngaih avangin an pawm hun nghah mek ani a ti a, project 25 te chu district hrang hrang ami ani a ti bawk.

Chief Minister Pu Lalduhoma’n tun Sorkar-ah Planning & Programme Implementation Department hnuaiah Restricted Tender hmanga hnathawh pakhat a awm thu sawiin hna chu Development of Integrated Programme Evaluation and Monitoring System with Server Hosting and AMC atan a ni a ti a, Mizoram Plan Analytics Software (MPLAN) siamna a ni tiin cheng nuai ₹ 85 man a ni a, Integrity Tech Solution in cheng nuai ₹ 69.99 in hna an thawk tih a sawi.

<><><>

CM : BANA KAIH SCHEME

Chief Minister Pu Lalduhoma’n Bana Kaih Scheme hnuaia Progress Partner loan hmu tawh zat chu mi 483 an ni a ti.

Mizoram Legislative Assembly thutkhawma ziaka zawhna a chhanna ah Pu Lalduhoma chuan Bana Kaih hnuaiah kumin March ni 1 atanga August ni 18 thleng Progress Partner 742 thlan chhuah zingah Loan hmu tawh mi 483 an awm a ti a, CM Special Package mi 396 hnenah pek a ni a ti bawk.

Chief Minister chuan Bana Kaih hnuaia tanpuina chu scheme hrang hrangah department kaltlanga pekchhuah a ni a ti a, Progress Partner sum dawn zat leh Trade an dawnna chu chhinchhiah fel vek ani ati bawk.

Bana Kaih hnuaiah hian sawrkar kum kal mekah cheng vbch 350 dah a ni a, Line Department 21 awmin pawn lam atanga Pawisa hmuhna a awm hranpa loh avangin Handholding convergence atangin NABARD leh Central Scheme hamthatna ken telte dawn zel a ni.

<><><>

FINANCE MINISTER

Finance Department changtu Chief Minister Pu Lalduhoma’n Tuialhthei chhiah an lak atanga kumin July thlenga Sorkarin sum a hmuh tawh zat chu cheng vbch 84, nuai 15,60,267 a ni a ti.

Finance Department changtu Chief Minister Pu Lalduhoma’n Petrol leh Diesel atanga Road Maintenance Cess lak a nih atanga kumin July thlenga Sorkarin sum a hmuh tawh zat chu cheng vbch 84, nuai 15,60,267 a ni a ti.

Assembly thutkhawma ziaka zawhna a chhanna ah Pu Lalduhoma chuan Petrol leh Diesel atanga Road Maintenance Cess kum 2024 October atanga lak a nih hnuah thlenga Sorkarin sum a hmuh tawh zat chu cheng vbch 84, nuai 15,60,267 a ni a ti a, kum 2025 atanga kum 2026 inkarah cheng nuai 1500 chu kawng siam nan pek a ni ati a, kum 2026-2027 inkarah cheng nuai 4325 pek ani ati bawk.

Pu Lalduhoma chuan Mizoram Road Fund Board-in an hman theih turin budget siam rualin Budget Estimate ah dah ani ati bawk.

<><><>

AGRICULTURE MINISTER

Agriculture Minister Pu PC Vanlalruata’n kumin August 18 thlenga Sorkar-in kuthnathawktute sawhthing a leisak tawh zat chu quintal nuai 2 chuang a ni a ti.

Assembly thutkhawma ziaka zawhna a chhanna ah he thu hi sawiin Pu PC Vanlalruata chuan Sawrkarin kuthnathawktute hnen atanga sawhthing a leisak zat chu quintal nuai 2,00,481.55 a ni a ti a, Sorkar-in sawhthing support price atan kum 2025 ah cheng vbch 141,50,74,578/- a pe chhuak tiin kum 2026 ah cheng vbch 51,13,17,737/- a pe chhuak a ti a, Kum 2 chhungin sawrkarin kuthnathawktute sawhthing leina atan cheng vbch 1,92,63,92,316/- a seng ral tih a sawi.

Agriculture Minister chuan Sorkar-in support price zawng zawng a pe chhuak vek tawh a ti a. DAMC account ah thun luh tawh niin kuthnathawktute account-ah thun luh chhoh mek a ni a ti bawk.

<><><>

ART & CULTURE MINISTER

Mizoramah sorkar humhalh State Protected Monuments 79 zingah Archaeological Survey of India (ASI) hnuaia humhalh pahnih a awm.

Art and Culture Minister Pu C. Lalsawivunga'n nimin Assembly Session-a ziaka zawhna a chhanna ah Mizoram Ancient Monuments and Archaeological Sites and Remains Act, 2001 hnuaiah Mizoramah sorkarin monument a humhalh 79 a awm thu a sawi a, heng zinga pahnih - Vangchhe khuaa Kawtchhuah Ropui leh Ralven Puk bakah Lianpui Hmun / Lungphun Ropui, Lianpui khua, Champhai district-a mi te chu ASI hnuaiah Monuments of National Importance-ah puan a ni a ti a. Kawtchhuah Ropui leh Ralven Puk te chu kum 2012 khan Monuments of National Importance ah puan a ni a, Lianpui Hmun/Lungphun Ropui chuan kum 2025 khan ASI tag a dawn thu a sawi bawk.

Art and Culture Minister chuan Mizoram hmun hlui 4 dang - Mamit district Rengdil khuaa Reng Puk, leh Kolalian khuaa Lung Milem, Champhai District Vangchhia khuaa Pipute Lungdawh leh Saitual district North Khawlek khuaa Ruhro puk te chu Protected Monuments-a puan tura rawtna a awm leh mek tih a sawi bawk a ni.

<><><>

HOME MINISTER

Home Minister Pu K Sapdanga’n Remna Thuthlung-a Mizote tana thil tha inziak zingah Inner Line Permit chu State Sorkar rawn (consult) hmasa lo chuan siam that leh hlih a nih lohna tur thu dah tel a ni a ti.

Assembly Session neih meka ziaka zawhna a chhanah he thu hi sawiin Pu K Sapdanga chuan Inner Line Regulation hman mek chu a nih anga chhunzawm tur a ni a, hei hi State Sorkar rawn (consult) hmasa lo chuan siam that leh hlih a nih lohna tur thu dah tel a nih thu a sawi.

Pu K. Sapdanga chuan inremna ah Mizo sakhua leh chin dan (religious and social practices) te, Customary law te, ram neih leh ram inhlanchhawn dan (ownership and transfer of land) chungchangah te Parliament in dan a siam chu Mizoram Legislative Assembly - in a pawmpui loh chuan Mizoramah hman a ni lovang tih ani a ti a, Mizorama tawng hmante official languagea hman theihna tur thu dah a ni tiin Mizoram-in High Court leh University hran a neih theihna tur pawh dah ani ati bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

H&TE MINISTER

Higher & Technical Department changtu Minister Dr Vanlalhlana’n Lungleia Mizoram State University chu ala function lo tih sawiin a ram tihfel ala nihloh avangin building sakna tur ruahmanna siam theih ala nilo a ti.

Assembly thutkhawma Aizawl West 3 bialtu MLA Pu VL Zaithanzama zawhna ziaka a chhanna ah he thu hi a sawi a, Dr Vanlalhlana chuan Mizoram State University dinna turah Post 70 siam phalna dawn tawh a ni a, Post 20 fill up phalna pawh dawn tawh niin, heng zinga Group ‘D’ post paruk chu fill up tawh a ni a ti a, tihfel hun chu sawi mai theih anilo tih sawiin theihtawpa hmalak mek anih thu a sawi a ni.

<><><>

VAIRENGTE POLICE

Vairengte Police Checkgate a duty Police leh CID (SB) tangkawp chuan August ni 24 khan kg-5 a rit methamphetamine an man.

Checkpoint-a duty te hian ruihhlo neitu Isaka kum 39 Zalen veng, Vairengte chu thuneitu an zawhfiah hnuah nimin khan Lungchangkaw, North Chhimluangah ruihhlo ni ngeia rin Methamphetamine Kg 4 dang an man belh leh a ni.

<><><>

NEPAL

Nepal-a lui tuilian thut avangin mi 160 dawn an thi a, India mi 133 tiamin mi 759 chuang chin hriatlohin an awm. Tuilian hi Tibet atanga intan niin khawpui leh thingtlang khua engemawzat a len a. Inkalpawhna lei leh kawlphehta hmunpuite a chhe nasa hle a ni. Nepal Foreign Minister Shisir Khanal chuan nimin zing dar 8.37 a lirnghingin Tibet a sawi hnu lawkah lui tui hi a rawn lian thut a ti a. Lirnghing avanga tlangpanga vur khal chim nasa chuan tuilian hi a siam niin a sawi a.

Nepal National Disaster Risk Reduction and Management Authority sawidanin tuilian hian Timure khua a chim hnuah district dang Nuwakot, Chitwan, Gorkha, Tanahu leh Nawalparasi East district a hrut leh a. Kathmandu khawpui atanga km 200 dawn a chim pha a ni.

<><><>

INDIA-NEPAL

India chuan Nepal sawrkar chu tuilian tuarte chhanchhuah leh chhawmdawl hnaa puih theihna awmah puih a tiam. President Droupadi Murmu-i chuan Nepal President Ramchandra Paudel hnenah an chhiatna tawh chu a tawrhpu thu sawiin chhanchhuah hna leh chhawmdawl hna thawh mekah India chuan Nepal sawrkar puih a intiam a ti.

Vice President CP Radhakrishnan pawhin Nepal tuilian tuartute a tawrhpu thu a sawi.

Prime Minister Narendra Modia chuan nimin khan Nepal PM Balendra Shah biain tuilian avanga chhiatna thlengah a tawrhpu thu a hriih a ni. India mipuite chuan Nepal unaute an tawrhpu thu sawiin an mamawhna apianga pui turin an inhuam a ti baw.

<><><>